



Филиппова Эвелина, 10 класс

Пызан сайын...

Бара чукөртчим ыджыд пызан сайё... Юам
чөскыд чай, сёрнитам грездса олём-вылём
йылысь.

Тайё керкаыс пыр меным рад: шонтас,
вердас, пось тшайён юктодас. Көзаяйкаыс менам прабабё - Артеева Евдокия
Алексеевна. Керкаыс абу ыджыд, но кымынён оз локны, ставныс төрöны.

Быд во Öдуш баб (тадзи велалöмаось шуны бабёос став внукуыс и
правнукуыс) Айму вöсна ыджыд тышын вермём лун кезлö кыскö дедölөн
медальяса гөрд неыджыд пöдушка. Ичөтдырйи меным сійö вöлі
чуймöданаён. Видзöді ме медальяс вылö и думайті: «Кытысь та мында
зарниыс пöрысь баблы, и мыйла найöс вурöмаось? Гашкö, медым оз вошны?»
Бöрын нин ме гөгөрвои, мый тайö зарни рöма медальясыс быдсяма дона
изьяссыыс донаджыкось, да кутшöм сьöкыд уджөн найöс шедöдсьöма. Таво
бабö кыскöма жö нин медальяссö...

Артеев Михаил Кузьмич – менам прадед. 1940 воö Изьва районса
ичөт Ёль грездысь армияö мунлöмаось 4 том зон. Сэні кадсö весьшөрö абу
воштöмаось: велöдчöмаось устав серти. Öти асылö лöддза-номъя 22-öд лунö
воö командир и висьталö лёк юөр – вошйис вöйна. Тайö вöлі 1941во.

Лöддза-номъя 23-öд лунö нин том салдатъясöс ыстöмаось Суйда кузя
катерьясөн враглөн тылö. Немечьяс уськөдчöмаось вына миномётной да
артиллерийской биён, тышкасьöм чöжыс пыр воöмаось выльысь-выль
вынъяс, но ставыс весьшөрö. Немечьяс воштісны уна солдатöс да офицерöс.
Миян прадедлөн полкыс 15 сутки чöж абу сетöма враглы вöля, абу лэдзöма
сійöс Мурмансклань. Немечьяслөн планыс, Мурманск öдийö босьтöм, олöмас
эз пöртчы.

Вöйна туйыс дедölөн вöлі кузь – Мурмансксянь Финляндия пыр
Норвегияöдз. Войвыв мездöм бöрын сійö веськаліс мöд Белорусской фронт

вылө. Косму төлысь 1-өд лунө 1945 воө Гданьск кар дорын дедө нёльöдысь сьöкыда доймис – биа чуктöм торйөн орöдiс шуйга кисö. Победа лунсö сийö вочаалис госпитальö мунигмоз.

Гортас дедö локтöма моз төлысь 1945-өд воө. Мамыс вочаалöма сийöс синваөн и висьталöма, мый Илья да Василий вокьясыс усьöмаöсь вöйна дырйи, а Тарас да Степан локтöмаöсь, ёна доймалöмаöсь. Эз тай жалит скөр да вир кисьтысь вöйнаыс некодöс!

Дедöлөн нёль медаль: кык «За отвагу», «За оборону Заполярья», «За победу над Германией». Медальяс вылө видзöдигөн öнi юрö воöны дзык мöд думьяс: «Эз тай öти вир войт му вылө усылы, и эз öти юрси си еджды, медем чужан муным колис дзоньвидзаөн. Оз öти семья öнiöдз на синва кисьты ыджыд дой вöсна, кодöс вöчис сьöлöмтöм вöйнаыс...»

Вöйна бöрас дедö уджалiс Изьва сиктын убойнöй пунктын веськöдлысьөн. Кад мысти аддзысис Евдокия Алексеевнакöд да 1950-өд воө гöтрасис. 1957-өд воө найö локтöны овны Кулим сиктö. Дедö да бабö быдтiсны 8 челядь – квайт нылöс да кык пиöс, сiдзжö радпырысь виччысисны внук-внучканысö: бабö чöсмöдлiс вöсни шаньгаөн да калиткаөн, а дедö ылöдлывлiс тешкодь сёрниясөн. Öнi нин налөн 17 внук да 27 правнук. Бабöкöд олiсны öтув 42 во. Дедö вöлi зэв бур верöсөн, айөн, дедөн. Сийö некор эз пукавлы уджтöг, пыр мыйкö вöчис. Көть и сылөн эз вöv öти кийс, сийö вöчис пыжъяс, кыйис чери, зэв бура ворсiс гармошкаөн.

Дедö кувсис 1992 воө кос му төлысь коймöд лунö. Зэв уна во нин дедö



оз пукав мянкöд тайö ыджыд пызан саяс. Гажтöмтчам... Но быдөн рöдвуж пиысь тöдö и казьтылö, мый мян семьяын вöлi татшöм герой – повтöм, вына, уджач да бур сьöлöма морт!